

Aruba su coordinador nacional di task force contra traficacion di hende ta un heroe global

Jeannette Richardson-Baars ta ricibi TIP Hero Award di Secretario di Estado di Merca Hillary Clinton

DIAMARS Secretario di Estado di Merca, Sra. Hillary Clinton a nombra Comisario Interino di Cuerpo Policial di Aruba y Coordinador Nacional di e Task Force Contra Traficacion di Hende, Jeannette Richardson-Baars un heroe global

den e lucha contra traficacion di hende.

Sra. Richardson-Baars a ricibi e reconocimiento pa su esfuersonan pa trece e lucha contra traficacion di hende na atencion di e comunidad na Aruba. El a crea un plataforma di colabora-

cion cu a haci posibel pa stakeholders na Aruba, como tambe regionalmente por reconoce, actua contra y sentencia esnan cu ta haci nan mes culpabel na e acto aki. Loke ta wordo considera mas importante ainda, ta cu e plataforma tambe ta provee

e victimanan cu luganan unda nan ta sigur y for di peliger.

E reconocimiento ta dedica na Sra. Richardson-Baars su trabao den e region Caribense y e esfuersonan di Aruba pa elimina traficacion di hende, manera ta stipula pa e seccion

di Traffic in Persons (TIP) di US State Department. E seccion aki ta supervisa con nacionnan ta coordina nan esfuersonan pa elimina traficacion di hende, cual ta wordo considera e crimen mas grandi contra humanidad di siglo 21.

“E reconocimiento aki ta bin como un sorpresa completo pa mi,” Sra. Jeannette Richardson-Baars a comenta. E Consulado Mericano na Curaçao ta esun cu a manda su nomber pa wordo considera como un nominado pa e TIP Hero Award. Bao di su liderazgo, Aruba a tuma pasonan grandi pa combati traficacion di hende pa medio di campananan di conscientisacion intensivo y introduccion di legislacion mas estricto na aña 2006.

E importancia di conscientisacion publico

Conscientisacion ta crucial no solamente bao di esnan involvi den e sistema di husticia, pero tambe bao di e comunidad general. Aunke cu medionan limita, Aruba a implementa un campaña simpel, pero hopi intensivo unda cu a siña e comunidad pa reconoce e señalnan di traficacion humano y ki pasonan pa tuma contra di esaki. E comunidad a wordo haci consciente cu traficacion humano y explotacion of abuso di hende, den e ambiente di prostitucion of trabao, ta un violacion di derechonan humano.

“Esaki no ta e resultado di solamente mi trabao, pero e resultado di e dedicacion di tur hende involvi den e Task Force pa Traficacion di Hende di Aruba,” Sra. Richardson-Baars a bisa. Ademas, Sra. Richardson-Baars ta atribui e exito di e task force na e maneho di Minister di Husticia y Enseñansa di Aruba, Sr. Arthur Dowers. “El a provee e oportunidad y espacio pa e team por traha, como cu e tambe ta considera e lucha contra traficacion di hende algo sumamente necesario pa e bienestar di e sociedad Arubiano,” el a añadi.